



Siverth K. Heilmann  
Atassut

UKA 2021/60  
9. november 2021

**Nannunik piniarneq illersuinerlu pillugit Namminersorlutik Oqartussat nalunaarutaat 1 allanngorteqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Taamaalilluni nannunik inuit najugaqarfinnut pisunik pisarinnittoqarsinnaanngorlugu, pisaqarnissaq sioqqullugu immikkut akuersissummik peqqaanngikkaluarluni.**

(Inatsisartunut ilaasortaq Jens Napätök', Naleraq)

Siullermik siunnersuuteqartuq Atassummiit qutsavigerusupparput, inatsisartunut isummerfigisassamik siunnersuuteqarninnut, imatullu Atassummiit oqaaseqarfigissavarput.

Siunnersuuteqartup nannunik piniarneq illersuinerlu pillugit Namminersorlutik Oqartussat nalunaarutaat 1 allanngorteqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuuteqarnera isornartoqartinnilarput.

Nannunilli inoqarfinnut pisunik pisarinnittoqarsinnaaneralu akuerseqqaartoqartarnissaanik atorunnaarsitsinissaq imminik ajunngikkaluartoq, Atassummiit isumaqarpugut, innuttaasut asimi pilinialrutik tupersimaartartut illuaraatilippassuillu amerlasoorujussuanngornikuusut, tamakkulu aamma nannunik ulorianartorsiortinneqalerpata illersorniarlugit, nalunaarusiortitsineq tamanut atuuttussamik naleqqusaanissaq Atassummiit pisariaqarluinnartoq isumaqarpugut.

Sumiiffiimmi ilaanni pisortanut imaaliallaannarluni attaveqaatit ajornarluinnartarput, taaamaattumik aamma Naalakkersuisut siunnersuuteqartumut akissuteqarnerminni ilumoorluinnarput, inuk inuilluunniit inuunerat ulorianartorsiortinneqalerpat, pinerluttulerinermut inatsimmi nannumik toqutsisinnaanerat illersorneqareersoq. Siunnersuuteqartup siunnersuutaa inatsisartuni akuerineqassappat, pinerluttulerinermut inatsisip naleqqussarneqartariaqalernissaanut Atassummiit akuersaarluta ammaffigalugulu oqaatigeriissavarput.

Siunnersuuteqartup tunngavilersuuteqarnermini tikkuartugai ilisarnartorpassuupput tunngaviatigullu isumaqatiginarlutik, tamakkaluartorli Naalakkersuisut akissutaat ilanngullugu paaseqatigiilluarnissaq siunertaralugu, ataatsimiititaliami susassaartumi nalilersorluarneqarnissaat pisariaqartuq Atassummiit isumaqarfigaarput.

Qujanaq.